

## Veliki uspjeh porodice Mastikosa iz Banje Luke Višestruka prvakinja BiH najmlađi trener u A

27/08/2013 10:15 by Administrator

Višestruka prvakinja Bosne i Hercegovine u plivanju na 50, 100 i 200 metara kraul Maja Mastikosa (20) postala je jedan od najmlađih trenera u Austriji, gdje za takmičenje u ovoj disciplini priprema najbolje plivačice. Maja je od 12. godine pa sve do punoljetstva držala bh. tron u plivanju kraulom od 50 do 200 metara, a potom je upisala Pravni fakultet u Austriji te paralelno studira i radi. Olakšavajuća okolnost joj je i što perfektno govori dva strana jezika.

### Ugodno s korisnim

Maja je od 12. godine pa sve do punoljetstva držala bh. tron u plivanju kraulom od 50 do 200 metara, a potom je upisala Pravni fakultet u Austriji te paralelno studira i radi. Olakšavajuća okolnost joj je i što perfektno govori dva strana jezika.

- Nisam mogla nastaviti trenirati, jer mi je to iziskivalo najmanje pet do šest sati rada na dan. Paralelno sa studijem to je bilo teško, pa sam zbog kvalifikacija i kvaliteta prije dvije godine dobila mogućnost da treniram plivačice. Smatram da sam spojila ugodno s korisnim, a maksimalno nastojim biti u kontaktu sa bh. sportisticama istovremeno - govori nam Maja.

Njen uspjeh je impresivniji i zbog životnih okolnosti u kojima je rođena i odrastala. Njeni roditelji Veljko i Olivera Mastikosa oboje su osobe s invaliditetom, oboljeli od različitih oblika distrofije.

- Naša ljubavna priča brzo se odvijala. U tom periodu prava je rijetkost bila da žena s tako ozbiljnim invaliditetom pronađe muža koji to nije u istoj mjeri, a posebno da se odluči da rodi. Početkom 1992. naša odluka čekala je na odobrenje Instituta za majku i dijete u Beogradu - prisjeća se Olivera.

### Energija i snaga

Devet mjeseci kasnije, nakon čuvanja trudnoće, carskim rezom rođena je Maja, a energija i snaga porodice Mastikosa fascinirali su tadašnje medicinsko osoblje te porodicu i prijatelje, koji su i danas velika podrška.

- Od kada se rodila, mi smo ponosni na nju. Ljubav koju razmjenjujemo, snaga je u kojoj se svi obnavljamo. Imali smo i teških faza... Zbog bolesti nisam je mogla voditi za ruku jedno vrijeme i to mi je bilo najteže u životu, ali kao što rekoh, to je bila jedna faza - navodi Olivera.

Veljko i Olivera, osim vlastitog obrazovanja, a zatim ulaganja u Maju, cijeli život posvetili su radu na razumijevanju osoba s invaliditetom u bh. zajednici te ostvarivanju boljeg statusa za ovu kategoriju stanovništva.

- Kod nas je problem što u društvu ne prihvatamo ništa što nije savršeno, sve ispod toga se skriva. Meni je teško što u medicinskim školama ljudi ne uče kako se podiže osoba s invaliditetom. Ja sam oboljela kada sam bila pred kraj fakulteta, ali i nakon toga nastavila sam raditi na sebi. Danas smo svi sretni - kaže Olivera, a nje je energija bila presudna za pozitivan duh ove porodice.

Izvor vijesti: Dnevni Avaz

---